

I. DISPOSICIÓN XERAIS

XEFATURA DO ESTADO

13336 *Real decreto lei 12/2010, do 20 de agosto, polo que se prorroga o programa temporal de protección por desemprego e inserción, regulado na Lei 14/2009, do 11 de novembro.*

O artigo 1.2 da Lei 14/2009, do 11 de novembro, pola que se regula o programa temporal de protección por desemprego e inserción, establece que a duración do programa será de seis meses contados desde o día 16 de agosto de 2009, ben que na súa disposición derradeira terceira se habilita o Goberno para que, tendo en conta as dispoñibilidades orzamentarias, as perspectivas económicas e a situación de desemprego, poida prorrogar ese programa por períodos de seis meses.

Facendo uso desa habilitación e considerando que o impacto da crise económica sobre o emprego e o mercado de traballo que o motivaron se mantiñan, o Goberno, mediante o Real decreto 133/2010, do 12 de febreiro, estableceu unha prórroga do programa temporal de protección por desemprego e inserción durante seis meses, desde o 16 de febreiro de 2010 ata o 15 de agosto de 2010, ambos incluídos.

A Resolución número 32, aprobada polo Congreso dos Deputados na súa sesión do 20 de xullo de 2010, con motivo do debate de política xeral arredor do estado da Nación, insta o Goberno a aprobar unha nova prórroga de seis meses do programa e a atender especialmente con ela os parados de longa duración, menores de trinta anos e maiores de corenta e cinco anos.

Por iso, considerando o contido da resolución aprobada polo Congreso dos Deputados, que o día 15 de agosto de 2010 concluíu a duración do programa citado e que se seguen a dar as condicións para a súa prórroga xa que se manteñen as causas que o motivaron, resulta procedente establecer a prórroga do programa temporal de protección por desemprego e inserción durante seis meses máis, ben que adecuando a prórroga aos criterios contidos na resolución mencionada, de xeito que pasan a ser beneficiarios daquela os desempregados menores de 30 anos ou maiores de 45, así como as persoas desempregadas, con idades comprendidas entre os 30 e 45 anos, sempre que neste caso teñan responsabilidades familiares.

A concreción dos destinatarios da nova prórroga do programa temporal por desemprego e inserción precisa dunha disposición con rango de lei, xa que a habilitación ao Goberno recollida na disposición derradeira terceira da Lei 14/2009 se limita á prórroga do mencionado programa, pero sen poder, en uso desta, introducir modificacións na regulación do seu contido.

Por iso, a través desta disposición, se axustan os destinatarios do programa temporal por desemprego e inserción ao mandato da resolución parlamentaria, incorporando as correspondentes modificacións na Lei 14/2009.

A prórroga do programa implica que aos traballadores que extingan por esgotamento a prestación por desemprego contributiva ou os subsidios por desemprego entre o día 16 de agosto de 2010 e o día 15 de febreiro de 2011 lles será de aplicación o establecido na Lei 14/2009 coas modificacións incluídas por esta norma.

Como quedou sinalado, a prórroga do programa temporal por desemprego e inserción, nos termos da resolución parlamentaria indicada, precisa normas con rango de lei. Agora ben, tendo en conta que o programa vixente esgotou os seus efectos o día 15 de agosto de 2010, concorren neste suposto as circunstancias de extraordinaria e urxente necesidade que exige o artigo 86 da Constitución como presuposto para ditar un real decreto lei, que posibilite que entre a finalización do actual programa e a súa prórroga non existan baleiros temporais na cobertura protectora de persoas que, ao esgotaren a duración das prestacións

ou dos subsidios por desemprego sen atoparen traballo, carecen doutros recursos, sen os cales existe o perigo de pasar á situación de exclusión social.

Na súa virtude, en uso da autorización concedida no artigo 86 da Constitución, por proposta do ministro de Traballo e Inmigración e logo de deliberación do Consello de Ministros na súa reunión do día 20 de agosto de 2010,

DISPOÑO:

Artigo único. Prórroga do programa temporal de protección por desemprego e inserción.

Prorrógase por seis meses, entre o día 16 de agosto de 2010 e o día 15 de febreiro de 2011, ambos incluídos, a aplicación do establecido na Lei 14/2009, do 11 de novembro, pola que se regula o programa temporal de protección por desemprego e inserción, aos traballadores en situación de desemprego que cumpran as condicións e requisitos establecidos nesa lei, sempre que, na data da solicitude de incorporación ao programa, sexan persoas menores de 30 anos ou maiores de 45 anos ou cunha idade comprendida entre os 30 e 45 anos, sempre que, neste último caso, teñan responsabilidades familiares, nos termos establecidos no número 2 do artigo 215 da Lei xeral da Seguridade Social, texto refundido, aprobado polo Real decreto lexislativo 1/1994, do 20 de xuño.

Para acceder á prórroga do programa sinalado será necesario que, dentro do período antes indicado, os interesados extinguisen por esgotamento a prestación por desemprego de nivel contributivo, ou os subsidios por desemprego establecidos no artigo 215 da Lei xeral da Seguridade Social.

Disposición adicional única. Medidas de control da prestación e de coordinación coas políticas activas de emprego.

O Ministerio de Traballo e Inmigración adoptará as medidas oportunas de cara a un control eficaz no acceso á prestación regulada na Lei 14/2009 e ao mantemento da súa percepción.

De igual xeito, e en coordinación colas comunidades autónomas, estableceranse os mecanismos precisos para lograr unha maior vinculación entre as políticas activas de emprego e a prestación mencionada.

Disposición transitoria primeira. Aplicación da Lei 14/2009, do 11 de novembro, pola que se regula o programa temporal de protección por desemprego e inserción.

Aos traballadores que extinguiron por esgotamento a prestación por desemprego contributiva ou o subsidio por desemprego ata o 15 de agosto de 2010 incluído, seralles de aplicación o establecido na Lei 14/2009, sen as modificacións establecidas neste real decreto lei.

Disposición transitoria segunda. Incorporación ao programa dos traballadores que esgotaron as prestacións a partir do 16 de agosto de 2010.

Os traballadores a que se refire o artigo único deste real decreto lei que extinguiron por esgotamento a prestación por desemprego contributiva ou o subsidio por desemprego entre o día 16 de agosto de 2010 e o día da entrada en vigor deste real decreto lei, deberán presentar a solicitude de incorporación ao programa dentro do prazo de 60 días contado a partir do día desa entrada en vigor incluído, na forma e cos efectos previstos no artigo 6 da Lei 14/2009.

Disposición derogatoria única. Derogación normativa.

Queda derogada a disposición derradeira terceira da Lei 14/2009, do 11 de novembro, pola que se regula o programa temporal de protección por desemprego e inserción, así

como cantas disposicións de igual ou inferior rango se opoñan ao establecido neste real decreto lei.

Disposición derradeira primeira. *Facultade de desenvolvemento.*

Facúltase o ministro de Traballo e Inmigración para ditar as disposicións que sexan precisas para o desenvolvemento e a execución do establecido neste real decreto lei.

Disposición derradeira segunda. *Título competencial.*

Este real decreto lei dítase ao abeiro do título competencial previsto no artigo 149.1.17.^a da Constitución, que establece a competencia exclusiva do Estado en materia de lexislación básica e réxime económico da Seguridade Social.

Disposición derradeira terceira. *Entrada en vigor.*

Este real decreto lei entrará en vigor o día da súa publicación no «Boletín Oficial del Estado» e producirá efectos desde o día 16 de agosto de 2010.

Dado en Palma o 20 de agosto de 2010.

JUAN CARLOS R.

O presidente do Goberno,
JOSÉ LUIS RODRÍGUEZ ZAPATERO